



29. maí 2013

Fréttatilkynning vegna afkomu Fjaraskipta hf. á fyrsta ársfjórðungi 2013

Afkoma lítillega undir væntingum stjórnenda

- ✓ Framlegð tímabilsins nam 1.286 m.kr. og lækkaði um 2,9% milli ára.
- ✓ EBITDA nam 539 m.kr. og lækkaði um 22,6% milli ára, aðallega vegna lægri tekna af farsímapjónustu og breyttra uppgjörsaðferða.
- ✓ Mikill vöxtur í gagnaflutningstekjum.
- ✓ Samdráttur í einkaneyslu birtist í minni fjarskiptanotkun einstaklinga.
- ✓ Brugðist við auknum kostnaði og breytingar boðaðar á verðskrá

Yfirlit lykiltalna:

Reikningstímabil:	1F 2013	1F 2012
Rekstur:		
Sala	3.066	3.216
Framlegð	1.286	1.325
EBITDA	539	696
EBIT	175	319
Hagnaður fyrir tekjuskatt	29	146
Sjóðstreymi:		
Handbært fé frá rekstri	118	352
Fjárfestingahreyfingar	-186	-235
Fjármögnunarahreyfingar	-106	-150
Handbært fé í lok fjórðungs	832	246
Dagsetning:	31.mar.13	31.des.12
Eignir:		
Rekstrarfjármunir	4.060	4.259
Óefnislegar eignir	7.104	7.129
Skattinneign	879	884
Handbært fé	832	1.010
Aðrar eignir	2.879	2.996
Eignir samtals	15.754	16.278
Skuldir og eigið fé:		
Eigið fé	6.766	6.782
Vaxtaberandi skuldir	7.056	7.172
Aðrar skuldir og skuldbindingar	1.932	2.324
Eigið fé og skuldir:	15.754	16.278



Rekstrarafkoma á fyrsta ársfjórðungi 2013:

Tekjur samstæðunnar námu 3.066 m.kr. á tímabilinu og lækkuðu um 150 m.kr. frá sama ársfjórðungi 2012. Lækkun samtengi- og reikitekna skýrir um helming þeirrar tekjulækkunar. Vöxtur var í gagnaflutningstekjum og sjónvarpstekjum en fastlínu- og farsímatekjur drógust lítillega saman. Tekjur af þjónustu við fyrirtæki voru svipaðar og í fyrra en notkun einstaklinga dróst saman og er það í takti við vísbendingar um samdrátt í einkaneyslu á fjórðungnum. Tekjur Vodafone í Færeyjum námu 468 m.kr. og drógust saman um 1,1% frá fyrra ári.

Kostnaðarverð seldra vara og þjónustu nam 1.780 m.kr. og lækkaði um 111 m.kr. frá 1F 2012 þrátt fyrir að gagnaflutningskostnaður hafi hækkað vegna endursamninga við Farice. Lækkun kostnaðarverðs milli ára skýrist fyrst og fremst af lækkun lúkningar- og reikigjalda og lægri gjalda vegna heildsölubjónustu.

Framlegð fjórðungsins nam 1.286 m.kr. og lækkaði um 39 m.kr. frá 1F 2012. Framlegð Vodafone er stöðugri mælikvarði á afkomu fjórðungsins en heildartekjur enda hafa veigamiklar áhrifabreytur á tekjur samstæðunnar oftast en ekki einnig áhrif á kostnaðarverð seldra vara og þjónustu.

Annar rekstrarkostnaður nam 1.111 m.kr. á tímabilinu og hækkaði um 103 m.kr. frá 1F 2012. Markaðskostnaður ársins 2013 er fröppungur, þar sem ákveðið var að framleiða auglýsingaefni fyrir stærstan hluta ársins á fyrsta fjórðungnum auk þess sem ráðist var í öflugt kynningarátak vegna nýrra þjónustuleiða. Þá hóf Vodafone að gjaldfæra orlofsskuldbindingu á hverjum ársfjórðungi á miðju ári 2012 og munu áhrif þeirra breytinga koma fram í ársfjórðungslegum uppgjörum ársins 2013. Áhrif orlofsskuldbindingar skýra 30 m.kr. af lækkun launakostnaðar samanborið við 1F 2012. Hagræðingaraðgerðir sem ráðist var í á 1F 2012 vógu gegn kjarasamningsbundinni launahækkun sem tók gildi á 1F 2013 en launakostnaður, án orlofsskuldbindingar, hækkaði þó lítillega milli ára.

Hrein fjármagnsgjöld námu 146 m.kr. á tímabilinu og lækkuðu um 27 m.kr. milli ára en félagið greiddi niður langtímalán sín um 2,2 ma.kr. og endurfjármagnaði eftirstöðvar á hagstæðari kjörum í ágúst 2012.

Hagnaður fyrir skatta nam 29 m.kr. og nýtti félagið skattalega eign á móti reiknuðum tekjuskatti sem nam 5 m.kr.

Sjóðstreymi á 1F 2013:

Handbært fé frá rekstri nam 118 m.kr. samanborið við 352 m.kr. á 1F 2012. Lækkun milli ára skýrist að langmestu leyti af niðurgreiðslu viðskiptaskulda og því að félagið greiddi afborgun og stóran vaxtagjalddaga af langtímaláni félagsins sem tekið var í ágúst 2012. Í framhaldinu verða gjalddagar langtímalána með 3 mánaða millibili. Fjárfestingar námu 186 m.kr. á fjórðungnum eða 6% af tekjum, sem er undir viðmiðum um 8-12% af árlegum tekjum samstæðunnar. Handbært fé í lok mars nam 832 m.kr.



Efnahagur 31. mars 2013:

Heildareignir í lok 1F 2013 námu 15.754 m.kr. og lækkuðu um 524 m.kr. frá áramótum. Helstu breytingar sem urðu á efnahag samstæðunnar á fjórðungnum voru vegna afskrifta rekstrarfjármuna umfram fjárfestingar auk afborgana langtíma- og viðskiptaskulda. Veltufjárhlutfall hækkaði úr 1,39 í 1,49 á fjórðungnum og eiginfjárhlutfall hækkaði úr 41,7% í 42,9%.

Vaxtaberandi skuldir námu 7.056 m.kr. í lok fjórðungsins og hreinar vaxtaberandi skuldir 2,4-földum EBITDA hagnaði síðustu 12 mánuða fram til loka reikningstímabilsins.

Yfirlit helstu viðburða á 1F 2013:

Fyrsti ársfjórðungur ársins var viðburðaríkur. Skrifað var undir samning við Ríkisútvarpið um stafræna sjónvarpsdreifingu til næstu 15 ára, en tekjur Vodafone vegna þjónustunnar á samningstímanum verða um 4 milljarðar króna og áhrifin á rekstur Vodafone verða jákvæð. Ætluð áhrif til hækkunar á EBITDA á ársgrundvelli nema um 3 - 5%. Þá má ætla að fjárfestingar Vodafone á árunum 2013 og 2014 verði umfram áður uppgefin viðmið vegna samningsins og verði á bilinu 10–13% af tekjum (en ekki 8 – 12%). Samningurinn tók gildi þann 1. apríl 2013.

Samið var við Farice um kaup á gagnaflutningsþjónustu til þriggja ára. Samhliða náðu félögin samkomulagi um þau ágreinings- og dómsmál sem uppi voru milli þeirra. Samningurinn fól í sér nokkra kostnaðarhækkun fyrir Vodafone sem mætti hækkuninni með verðbreytingum á netþjónustu til viðskiptavina. Í framhaldinu hóf Vodafone viðræður við Emerald Networks um afnot af gagnaflutningsstreng sem ráðgert er að leggja milli Bandaríkjanna og Evrópu með hliðarlegg til Íslands. Náist samkomulag milli aðila, og verði strengurinn lagður, mun það hafa jákvæð áhrif á gæði og verð á gagnaflutningi til og frá Íslandi.

Nýjar áskriftarleiðir í farsímaþjónustu voru kynntar í mars. Áskriftarleiðirnar byggja á föstu mánaðargjaldi fyrir tiltekinn mínútufjölda, fjölda smáskilaboða og tiltekinn gagnamagnsflutning í farsímann. Innifaldar mínútur gilda jafnt í farsíma óháð kerfi, heimasíma og til útlanda sem er nýjung á Íslandi. Sett var upp sérstök reiknivél á heimasíðu Vodafone þar sem viðskiptavinir geta reiknað út hvaða þjónustuleið hentar best notkun þeirra. Sala á nýju áskriftarleiðunum hefur gengið vel og tekist hefur að snúa við neikvæðri fjöldatölupróun undanfarinna missera.

Aðalfundur félagsins var haldinn þann 11. apríl síðastliðinn þar sem ný stjórn var kjörin. Hjörleifur Pálsson og Heiðar Már Guðjónsson komu nýir inn í stjórn en aðrir stjórnarmenn eru Anna Guðný Aradóttir, Erna Eiríksdóttir og Hildur Dungal. Varamenn í stjórn eru Agla Elísabet Hendriksdóttir og Erlendur Steinn Guðnason. Skömmu fyrir aðalfund seldi Framtakssjóður Íslands allan eignarhlut sinn í félaginu og á fundinum lauk formlega aðkomu sjóðsins að félaginu og stjórn þess.



Ómar Svavarsson, forstjóri:

„Afkoman á tímabilinu skýrist í megindráttum af þremur þáttum. Í fyrsta lagi hafði samdráttur í einkaneyslu neikvæð áhrif á fjarskiptanotkun einstaklinga og í annan stað höfðu breytingar á uppgjörsaðferðum neikvæð áhrif á afkomu fjórðungsins, þar sem kostnaður færðist milli tímabila. Þriðji áhrifaþátturinn var aukinn rekstrarkostnaður, sem hækkaði nokkuð milli ára. Við erum ósátt við þá niðurstöðu og höfum þegar hafist handa við að vinda ofan af því. Þá eru ráðgerðar breytingar á verðskrá, sem munu taka gildi 1. júlí nk.

Annars er sérlega ánægjulegt hve gagnaflutningstekjur hækka mikið milli ára og að sjónvarpstekjur haldi áfram að aukast. Þá hefur bæði notkun og sala snjalltækja aukist verulega, en með nýjum áskriftarleiðum fyrir farsíma höfum við komið til móts við breytta notkun og styrkt samkeppnisstöðu Vodafone. Góðar fréttir felast einnig í nýjum dreifisamningi við Ríkisútvarpið, sem ekki aðeins hefur jákvæð áhrif á rekstur félagsins heldur felst í honum mikilvæg viðurkenning á tæknilegri getu og samfélagslegu mikilvægi Vodafone.

Þá væntum við þess að samdráttur í einkaneyslu sé tímabundinn og fögnum fréttum um að Væntingarvísitala Gallup hafi í byrjun maí verið hærrí en undanfarin fimm ár. Áform stjórnvalda um breytingar á rekstrarumhverfi fyrirtækja senda líka jákvæð skilaboð inn í atvinnulífið.“

Kynningarfundur 30. maí 2013:

Opinn kynningarfundur verður haldinn fimmtudaginn 30. maí 2013 í höfuðstöðvum félagsins að Skútuvogi 2. Kynningin hefst kl. 8:30 í fundarherberginu Space Invaders, gengið er inn í verslun. Boðið verður upp á morgunverð frá kl. 8:00.

Á fundinum mun Ómar Svavarsson, forstjóri Vodafone, kynna afkomu félagsins og svara spurningum ásamt helstu stjórnendum.

Kynningarefni fundarins verður hægt að nálgast að honum loknum á síðu fjárfestatengsla Vodafone á www.vodafone.is/fjarfestatengsl

Fjárhagsdagatal 2013:

- | | |
|-------------------------|-------------------|
| ✓ 2. ársfjórðungur 2013 | 28. ágúst 2013 |
| ✓ 3. ársfjórðungur 2013 | 27. nóvember 2013 |

Frekari upplýsingar:

- ✓ Grétar Már Axelsson tekur á móti fyrirspurnum á netfanginu fjarfestatengsl@vodafone.is eða í síma 6699720.